

WAKITÀ UWANA POL ATSETSÈR À AZLA EFESƏYA Lettre de Paul aux Eph'esiens

Ayyi

¹ Gi Pol la uwana gətsetser wakità uwanay, à gi uwana Zəzagəla akəsàni gi, kà gi ana magay masləlay aña Yesu Kristu. Gəsləl à akul à awtày, akul azlaməna masla gay Zəzagəla la Efesus, akul uwana kadiṇaw gəl à Yesu Kristu à vok, ṅgaha akul uwana kagaw tekula la masla la abà. ² Zəzagəla Baba gami, la Sufəl gami Yesu Kristu tapisakulla gay à vok ṅgaha la mav à akul lapiya.

Tatak delga uwana Zəzagəla avà à tsəhay aṅha.

³ Məzləbà Zəzagəla Baba aña Yesu Kristu gami! Uwana apìs à anu gay à vok la mav à anu tatak gesina, uwana la zagəla, la makoray aṅha la abà, avà à anu uwana kà, kà uwaga mədahama gay à vok la Yesu Kristu. ⁴ Zəzagəla atsatsàmàni anu la Yesu Kristu dagay uwarà, à mok uwana aləg madàh gudəṅ à vok kà, kà anu aña magay azlaaṅha, kokudà mawisiga la huma aṅha bay. ⁵ Kà uwana awoya anu, akəs kà mapakanula kà azlabəza aṅha kà sləray uwana Yesu Kristu adahàṅ. Akəsəl à gəl, à uwana adahàṅ kiya uwaga. ⁶ Adahàṅ kiya uwanay kà, kà anu aña mazləbay kà vok mahamay aṅha, kà uwaga dzəba aṅha səla aw. Avà à anu kà deyday

pəra, kiya uwaga kà, uwana mədagay tekula la bəzi gay ləv aŋha ndzer.

⁷ Kà uwana adapalla anu la aŋiz aŋa Kona aŋha uwaga, adamatsan tsakana gami ala, ŋgaha apəhanula məŋ vok mahamay aŋha. ⁸ Avà à anu vok mahamay la mahənla la pawasla, bokuba magodfay kà, apakànula kà azlaməna matsihila gà, adahàn kiya uwaga kà, kà anu aŋa masəlay hanəkəli aŋha à tsəh. ⁹ Apəhanula tatak mahad vok à ahəŋ gà, uwana uwarà asəl madehəŋ, tatak uwana adzùgw madehəŋ la Yesu Kristu. ¹⁰ Madzugway aŋha kà, mok uwana kaslà adəslay kà, adahama gay azlatatak uwana à vok la zagəla la uwana la vədah, kà Yesu Kristu aŋa magay Sufəl lakəl aŋha.

¹¹ Zəzagəla adahàn azlatatak gesina bokuba uwana asal madehəŋ, kiya uwaga atsatsəmànì anu dagay uwarà, bokuba uwana asa à gəl aŋha, kà anu aŋa magay azlaaŋha. Kiya uwanay mədahama gay à vok la Kristu, mədabəza humà mazuw gày gami, ¹² kà azladza aŋa mazləb mənğa aŋha. Anu, anu azladza matera uwana mèvà ləv gami à Yesu Kristu, ¹³ kà aŋkul kà, kiya uwaga babay. Katsənàw gay dziriga, uwana gay marabəŋ, la uwana Zəzagəla abəlla akul, kavàw ləv aŋkul à Yesu Kristu, kadahàwwəŋ kiya uwaga kà, kà uwana kahamàw gay à vok la masla. Zəzagəla adanah à akul masəlay aŋha à vok, masəlay uwaga kà, kà Masasədok tsikasla uwana apəh à ahəŋ uwarà. ¹⁴ Avà à anu Masasədok dagay uwarà, ŋgaha apəlla ala kà mədabəz dèwdèw tatak, uwana apəh

à azlatsəhay aŋha à ahəŋ. Mədàbəzal la vudf uwana Zəzagəla adàbəl anu aŋa tetuwa. Məzläbà Zəzagəla uwana mənğa!

Madəv kudfa aŋa Pol

¹⁵ Kà uwaga à uwana, kikay gəgodfay à Zəzagəla kà aŋkul. Gətsənà mad à huma à gay aŋkul la madin gəl à Sufəl Yesu Kristu à vok à abà, gətsənà mawoy azlaməna madin gəl à Zəzagəla à vok aŋkul bay. ¹⁶ ‘Kikay’, gəgodf à Zəzagəla koksikoksi kà aŋkul, à baŋa gədəval kudfa. ¹⁷ Gədəv kudfa à Zəzagəla Baba mənğa, Zəzagəla gà, la uwaga à uwana Sufəl Yesu Kristu adàhla sləray aŋha, gədəval kudfa, kà masla aŋa matapakakulla matsihila aŋha, ŋgaha masla aŋa mav à akul maslay la ŋuləm aŋa masəl masla. ¹⁸ Gədəv kudfa à Zəzagəla kà masla mapəzl akul haŋkəli aŋkul la udfaka aŋha, kà akul aŋa manəŋ makədf gəl à ahəŋ aŋa tetəvi, uwana akul kadàbəzaw à abatà, katsənaw magay mənğa aŋa makoray aŋha, la azlanadzipo uwana adahəŋ à ahəŋ, kà aŋa azladza aŋha gesina. ¹⁹ Asa à gi babay kà, kasəlaw mənğa aŋa ndzədfa aŋha, kà aduwa tatak gesina, bokuba uwana ndzədfa aŋha adàh sləray la anu la abà, anu uwana mədin gəl à masla à vok. Ndzədfa kà bə uwatà. ²⁰ A uwana adàh sləray la Yesu la abà, awùlla à uda la mamətsay. Mok uwana adawùlla à uda la mamətsay kà: “Adzà madzay la ahəl kaf gulo lakəl”, Zəzagəla agòdfal “la zagəla.✧” ²¹ Kagay Sufəl lakəl aŋa azlatatak gesina, lakəl aŋa azlamalika la azlasufəl aŋatà, ŋgaha lakəl

✧ **1:20** 1.20 Mahabay 110.1

aña azlatatak gesina, uwana atà la ndzəfa la zagəla bay.” Masla la uwana aduwa atà. Aga Sufəl lakəl aña azladza gesina, baməraka tadagay azlauwi, aga lakəl aña azlauwana la gudəŋ uwanay la vok babay, ŋgaha lakəl aña gudəŋ à vok, uwana adàsa à waŋ la huma aya bawbaw. ²² Zəzagəla abək tatak gesina à tsəh asik aŋha, apakəŋ ala kà Sufəl lakəl aña tatak gesina, ŋgaha agəŋ madzahaga aña azlaməna gay Zəzagəla.✧ ²³ Maham à ahəŋ məna gay Zəzagəla kà, vok aña Kristu, la uwaga la abà la uwana, masla apəhla vok ala la paraka, ŋgaha azlatatak delga gə gesina kà, aga kà la masla la abà.

2

Dagay mamətsay tsəràh à sifa

¹ Mok uwana uwarà kà, akul kà bokuba akul azlamamatsayga la sifa aŋkul la abà, kà uwana kadahàhàwwàŋ kà tsakana. ² Kanəfaw madəhəŋ aña azladza gudəŋ à vok uwanay, kanəfaw sufəl aña azlamasəfok mawisiga uwana seteni, aga la ndzəfa la tataka aña zagəla la abà la kutso. Masla la uwana adəh sləray la azladza uwana la abà takweska Zəzagəla. ³ Anu gesina kà, məgà bokuba atà babay à uwarà, mədahəŋ kà dəwdəw tatak mawisiga, uwana asà à ləv gami koksikoksi. Məzləbàh kà gəl gami pəra. Kà uwana məgà kiya uwaga kà, anaka seriya aña Zəzagəla atəd à anu à gəl bokuba à azladza anik babay.

✧ **1:22** 1.22 Mahabay 8.6

⁴ Ama lagwa kà, kiya uwaga aya aw. Hərəz kà, vok ahamà Zəzagəla mənğa kà, anu kà mapəlla vok mahamay anğa ala. ⁵ Baməraka mədagay bokuba azlamamatsayga la tsakana gami la abà, masla kà avà à anu sifa adəv à gay aw, uwana la Yesu Kristu la abà. Abəl akul kà deyday pəra. ⁶ Kà uwana mədagay tekula la Yesu Kristu, awùlla anu à uda la mamətsay, abək anu à zagəla, kà anu anğa makoray la slaka gə la Kristu. ⁷ Adahən dzəba anğa səla aw, kiya uwanay kà, kà ahəl anğa Yesu Kristu, kà mapəlla ala la azlakaslà uwana la abà, adasa à wan la huma la gay, kà vok mahamay anğa kà mənğa. Aduwa tatak gesina. ⁸ Zəzagəla abəl akul, kà uwana kadişaw gəl à masla à vok. La madəhən kiya uwaga, abəl anu deyday, awkà kà madəhən ankul aw. Avà à akul mapis gay à vok anğa deyday aya. ⁹ Zlahaw kagodəw kà, kà uwana mədahən sləray delga, kagodəw zlə kà. Avà kà deyday, dza atsa zlapay aw. ¹⁰ Aga kiya uwanay, kà uwana masla la uwana adahà à anu. Avà à anu sifa mawga la Yesu Kristu, kà azlatatak delga la sifa gami la abà, delga uwana adahən à ahən kà dagay uwarà kà anu anğa madəhən.

Mədəhama gay à vok la Yesu la abà

¹¹ Kà uwaga kà, gəwulla à akul à gəl, akul azladza uwana azla Yahudiya aw, dagay la mayyi akul, à akul, azladza uwana makadav atà à uda gə kà, tazala à akul ala kà: Akul azlamakadav à uda gə aw. Ama tapəhay kà lakəl anğa tatak uwana la uda gə pəra, à uwana azladza tadəhən à vok anğatà à vok pəra. ¹² Awul akul à gəl kà,

la kaslà uwatà, kagàw kèrkèr la Kristu, uwana mafal dzakwa à gəl gà, kagàw azla Isərayel aw. Zəzagəla akəs vok slawda la tsəhay anha, la uwana la abà apəh à atà à ahəŋ kà anja madəfehəŋ, ama akul kà, tatüğw la akul aw, kà uwana akul azladza à uda, tatak la ahəŋ, à uwana kafawal yewdi à tsəh la uwaga la abà aw. Kagàw la gudəŋ la vok, ama kasəlaw Zəzagəla aw. ¹³ Uwarà kà, kagàw kèrkèr la Zəzagəla. Ama lagonay kà, kahamaw gay à vok la Kristu. A masla uwana asəkw aniz anha à vədah kà akul, kità kà, akul kèrkèr la masla aya aw. ¹⁴ Kikay kà masla à uwana masəl vok la ahəŋ la tataka gami la abà. Dagay uwarà azla Yahudiya la azladza uwana azla Yahudiya aw tavàhàla. Ama masla la uwana apakànula tsəhay tekula, madəguva la ahəŋ uwarà la tataka gami la abà, bokuba zlagam. Masla akalàh à ahəŋ, la mamətsay anha. ¹⁵ Mapəhay anja azla Yahudiya agod: ‘Dahəŋ uwanay, uwanay’, ama masla azəŋ ala. Adəhəŋ kiya uwaga kà, kà masla anja maham gay azla Yahudiya à vok la azladza uwana azla Yahudiya aw. Tagay tekula la masla la abà tadasəl vok, ¹⁶ kà uwana aməts à ahəf à adi, madəguva la ahəŋ la tataka anjatà la abà aya aw, adazəb à uda. Kikay kà masla adapakatala kà tsəhay anha, ŋgaha adasəl atà vok. ¹⁷ Asà à waŋ à gudəŋ à vok, kà mazakulla gay marabəŋ, akul uwana akul azla Yahudiya aw kagàw kèrkèr la Zəzagəla uwarà, lagonay kà kabəzəwwal lapiya. ŋgaha à anu azla Yahudiya, uwana məgà nekwa la slaka Zəzagəla mədabəz

lapiya babay.☆ 18 Gəgodf kà anu azla Yahudiya, la akul uwana azla Yahudiya aw, kà anu ɲgaha akul bay, mədabəz tetəvi la Kristu la abà kà anu aɲa maz vok à slaka Zəzagəla. Masasəfok tsikasla azlak à akul, bə Masasəfok gə la uwaga azlak à anu babay.

19 Kità kà, akul azlaməlok aya zlà ma aw. Akul azlaməna mas à waɲ la uda aya aw. Akul azladza gudəɲ adagay, bokuba azladza anik, uwana azlaaɲa Zəzagəla, akul la huf gày aɲha adagay. 20 Akul kà bokuba akul azlaakur uwana tahazlla gày, matatukw gày kà azlaməna asik, la azlaməna mapəh à atà gay ahəl kà mapahəh à azladza, ɲgaha Yesu Kristu la gəl aɲha kà, akur mawadf gày, akəs azlaanik. 21 Kà masla la uwana, gày adza à ahəɲ la afik, ɲgaha azala vok à gəl akul la azladza anik babay kà, kagaw kà bokuba gày uwanay Sufəl Zəzagəla adza à ahəɲ la aku. 22 Kà uwana kahamaw gay à vok la Yesu Kristu, akul babay la azladza anik kà, bokuba gày uwanay la uwana la aku Masasəfok Zəzagəla adza à ahəɲ la aku.

3

Zəzagəla ayəh kà Pol az gay marabəɲ à azladza uwana azla Yahudiya aw

1 Kà uwaga à uwana gəpəh à akul kà, gi Pol gədav kufə à Zəzagəla kà aɲkul. Gi la daɲay kà Yesu Kristu, tawadfa gi kà akul, uwana azla Yahudiya aw. 2 Təga kà, katsənàwwəɲ kà Zəzagəla afə gi à ahəɲ, kà gi aɲa madəh sləray kà aɲkul.

☆ 2:17 2.17 Yesayya 57.19

Kà vok mahamay anha à uwana gədehəŋ kiya uwanay. ³ Zəzagəla apəhgəla tatak mahadəŋ à ahəŋ gə, nasiri uwana uwarà, kà gi anja masəlay. Gədatsetser à akul lakəl anja nasiri uwaga ŋuv. ⁴ Anja, kadzeŋaw uwaga kà, kadatsenaw nasiri uwana gəsəl lakəl anja Yesu Kristu. ⁵ La məl uwana la abà, adada à lig kà, Zəzagəla apəhla tatak uwaga à azladza aw. Ama lagonay kà, adasləl Masasəfok anha à waŋ kà mapəhla à azlaməna maz gay anha, la à azlaməna mapəh à ata gay ahəl kà mapəh à azladza uwana abək atà à fəta à awtəy kà azlaanja. ⁶ Aganay tatak uwana mapəhla ala gə: Uwana Zəzagəla avà à azla Yahudiya bokuba ləmana kà, akul uwana akul azla Yahudiya aw kà, kadəbəzawwal babay suwaŋ: Akul la azla Yahudiya kà, kagaw tekula. Tatak uwana Zəzagəla apəh à ahəŋ, kà mav à azladza, uwana azlaanja Yesu Kristu kà, adavà à akul babay. Azlatatak uwaga kà, tasà à uda kà la gay marabəŋ la abà.

⁷ Vok ahamà Zəzagəla, azəb gi à sləray anha à abà, kà gi anja maz gay marabəŋ uwanay à azladza. Adfahà uwaga kà la maslay anja. ⁸ Gi masla mazəb dagum anja azlaməna madiŋal gəl à vok anik gesina, bə la uwaga bay kà, Zəzagəla akəs à gi, kà gi anja maz gay marabəŋ, uwana asà à uda la ahəl anja Yesu Kristu, à azladza uwana azla Yahudiya aw. Ləmana uwaga kà, mənğa zəŋzəŋ, kà matsənəŋ à uda anja azladza. ⁹ Masla la uwana avà à gi tetəvi kà mapəhla à azladza gesina lakəl anja tatak mahadəŋ à ahəŋ gə, uwana uwarà Zəzagəla

apəh, adapaka vok. Zəzagəla la uwana aṅaləh azlatatak gesina, adahà tatak uwaga à ahəṅ la yewdi aṅa azladza, tsəràh à lakana. ¹⁰ Lagonay kà, Zəzagəla adapəhla ala la tataka azlaməna madiṅal gəl à vok la abà, kà azlamalika la azlasufəl aṅatà tadənəṅ azlaməna madiṅal gəl à vok, ṅgaha atà aṅa masəl matsihila aṅa Zəzagəla. Kà uwana matsihila aṅha kà gərgər la azlatetəvi anik anik. ¹¹ Kiya uwaga adahəṅ bokuba uwana ayəh madfehəṅ, à mok uwana gudəṅ à vok aləg madzəka à vok dadəṅ. Apəhla uwaga ala la magola la ahəl aṅa Sufəl gami Yesu Kristu. ¹² Kà uwana anu azlaaṅa Yesu Kristu, ṅgaha mədiṅ gəl à masla à vok kà, mədàza vok à slaka Zəzagəla la kokudə kurit yewdi. ¹³ Tsa Zəzagəla adafehəṅ kiya uwanay kà, gədəv à akul kudə, kà ləv aṅa mavalay akul à gay, kà uwana gəs ṅgərpa kà akul, aw. Azlauwala kà à vok, kà akul karabaw kà dza uwana as ṅgərpa kà akul, hadəy.

Masal aṅa Yesu

¹⁴ Kà aṅa azlatatak uwanay gədapəh à akul kà, gədəv kudə à Zəzagəla la makədəf à ahəṅ, ṅgaha la iyaw tugwi kà aṅkul. ¹⁵ Ndzer, Baba uwanay kà, Baba aṅa azladza gesina uwana la zagəla, ṅgaha la azlauwana la vədəfah. ¹⁶ Ndzer kà, masla kà la mazləbəy, akoray gesina. Kità kà, gədəval kudə kà, kà Masasədfok aṅha aṅa mav à akul ndzəfə, kà akul aṅa magay la ndzəfə la ləv aṅkul la tsəh. ¹⁷ Gədəval kudə babay, kà Yesu Kristu aṅa madz à ahəṅ la ləv aṅkul la tsəh, kà uwana kadiṅaw gəl à masla à vok.

Gədəval kufda babay, kà akul aña mawoy vok akul à akul. Baña kawoyaw vok kà akul à akul, mawoy vok aňkul adəgay la ndzəfa, bokuba ahəf uwana adəhàla slilih aňha à tsəh iyaw, ɲgaha bokuba gày uwana atsizl à matatukway à afik lela. ¹⁸ Kiya uwaga akul, la azlaməna gay Zəzagəla anik gesina kà, səlāw kà Yesu Kristu awoya anu kaykay. Baməraka kadədaw à uwali, kadədaw à zagəla, kadədaw à afik à agu kà, mawoy akul aňha kà, bə aga la ahəɲ la abatà. ¹⁹ Gədəv kufda à Zəzagəla kà, kà akul aña masəl mawoyəɲ aňha, uwana məslala vok aña matsənəɲ la paraka dadəɲ aw. Kà azlatatak uwana tahəɲ Zəzagəla ala, aña mahəɲ ləv gami ala suwaɲ.

²⁰ Zəzagəla kà, aslala vok aña madəh tatak gesina. Aduwa gesina, uwana mənəval kà madəhəɲ, aduwa madzugway gami gesina, adəhəɲ kà la maslay aňha, uwana adəh sləray la anu la abà. ²¹ Məzləbà masla, anu azlaməna maham à ahəɲ mənəna gay Zəzagəla gesina, ɲgaha Yesu Kristu bay. Məzləbà masla koksikoksi aña tsərəh à awtəy! Amen.

4

Vok aña Yesu Kristu kà tekula

¹ Tsa kiya uwanay kà, gədəv à akul kufda, kà uwana taduw gi à daɲay kà sləray aña Sufəl Yesu Kristu, uwana gədəhəɲ. Kamkam gətuwa à akul à vok kà matuway kà, nəfəw maday delga à uwana Zəzagəla azaləkulla. ² Gəw tələmma lela, gəw azladza delga, gəw azlaməna mabasiɲ,

wòyàw vok akul à akul, ɲgaha basàwwàɲ vok kà akul à akul babay. ³ Wàdàw vok à uda kà madz à ahəɲ la tekula la abà, bokuba uwana Masasəðok apakànula tekula, ɲgaha dzàw à ahəɲ la lapiya la abà la tataka aɲkul la abà, kà akul aɲa magay tekula. ⁴ Maham à ahəɲ məna madiɲal gəl à vok bokuba vok aɲa Kristu, vok tekula pəra. ɲgaha Masasəðok bay, kà tekula pəra. Tatak uwana Zəzagəla azalànula kà, anu aɲa maduwal à adi kà tekula pəra babay aya. ⁵ Sufəl gami Yesu kà tekula, madiɲal gəl à vok gami kà tekula, ɲgaha tetəvi aɲa batem bay kà tekula. ⁶ Zəzagəla kà tekula pəra, uwana masla Baba aɲa azladza gesina. Akoray lakəl aɲa tatak gesina, aga la slaka gesina, aga la azlatatak gesina la abà babay.

⁷ Kəla uwabeyuwi gami gesina abəzal mavəy la aɲha la aɲha, bokuba uwana asa à Yesu Kristu, avà à anu. ⁸ Uwaga bokuba uwana tatsetsèr à wakitə Zəzagəla à abà, tatsetsèr lakəl aɲa Kristu kà:

'Mok uwana adada à afik à zagəla kà, akəðàsl azlaməna məzam aɲha, ahahay atà à tsəh, adàla atà à afik bay. La lig la ahəɲ avəh azlamavəy à azladza la gudəɲ la vok.'[☆]

⁹ Haday, la magoɖay: Maday à zagəla, mana asal magoɖay ma? Uwaga asal magoɖay kà, asà à vəɖah tsəràh à kutso à abà dadəɲ. ¹⁰ Dza uwana asà à abanay à vəɖah kà, bə dza gə la uwana ahəd à zagəla. Amatsikakadəy aɲa zagəla à afik, kà masla aɲa makoray lakəl aɲa azlatatak gesina. ¹¹ Masla la uwana avəh azlamaslay à

☆ 4:8 4.8 Mahabay 68.18

azladza. A azlaməna masləlay anik avà à atà maslay, kà mad maz gay aᅇha. A azlaanik mapəh à atà gay ahàl aᅇa Zəzagəla, kà mapəh à azladza, à azladza anik bay, avà à atà maslay kà maz gay aᅇha à azladza uwana tasəl Zəzagəla aw. A azladza anik bay, avà à atà maslay kà manəᅇla azlamaham à ahəᅇ məna gay Zəzagəla, ᅇgaha azlaanik babay kà, avà à atà maslay kà matapla azladza anik. ¹² Avàh sləray uwaga kiya uwaga, kà masla aᅇa madàh azlaməna gay Zəzagəla à ahəᅇ, kà madàh sləray aᅇha, kà maham à ahəᅇ məna gay Zəzagəla uwatà à vok aᅇa Kristu aᅇa mad à huma à gay. ¹³ Ada à huma à gay la mawad vok à uda kà, tsərah à uwana anu mədàgay tekula, kà uwana mədav ləv gami à Yesu gesina, ᅇgaha gesina gami məsəl masla. Kiya uwaga mədàgay azlazil, mədàgay sətaka bokuba Kristu bay. ¹⁴ Kità kà, la kaslà uwaga mədàgay azlabəza aya aw. Azlaməna mapapatàh dza uwana tapapatàh à azladza la dēmdēm aᅇatà kà, la azlagay aᅇatà uwana tapapatanula, tadàza anu à tetəvi à tsəh la matapanula aᅇatà aw, bokuba uwana afaᅇ abəlak kəslah iyaw, wùlà à abanay, wùlà à abanay lakəl iyaw aw. ¹⁵ Məga kiya uwaga aw, məwoya vok kà anu à anu, ᅇgaha məpəh vok dziriga la tataka gami la abà, kà anu aᅇa magay bokuba Yesu ndzer, à masla uwana lakəl gami la afik gesina. ¹⁶ Masla la uwana abək azladza à ahəᅇ gesina, kà atà aᅇa magay tekula bokuba vok aᅇa dza uwana atsà vok la azlaamil. La vok aᅇa dza kà kiya uwaga babay. Baᅇa

azlamanabay aña vok tadəh sləray aņatà lela kà, vok gesina azigənay lela. Kiya uwaga babay la maham à ahəņ məna gay Zəzagəla, baņa azladza tawoya vok kà atà kà atà kà, maham à ahəņ uwana vok aña Kristu kà, agay la ndzəfa kaykay.

Sifa mawga la Kristu la abà

¹⁷ Tatak uwana asa à gi mapəhay kà gəpəhay la sləm aña Sufəl, gi gəfaņ à afik la magofay kà, kanəfaw tetəvi uwana azlauwana tasəl Zəzagəla aw tanəfay aw, kà uwana atà kà tadzugway kà azlatatak deydayga pəra. ¹⁸ Madzugway aņatà kà mələs gə. La huma aña sifa mawga, uwana Zəzagəla avəy kà, atà kà bokuba azlaməlokga, kà uwana atà la gəl dzaņdzanğa hawhahaw, ŋgaha kiya uwaga kà tasəl tetəvi aña Zəzagəla aw. ¹⁹ Ziruwı aņatà la ahəņ aw, tavà vok aņatà kà azlatatak mawisiga pəra, ŋgaha tatsizl à ahəņ aw.

²⁰ Kà aņkul kà, Kristu atəpakulla kiya uwanay aw. ²¹ Masla la uwana kakəsəwwalla gay la ahəl ala aw takay? Akul uwana kahaməw gay à vok la Kristu kà, tatəpakulla azlatatak delga, uwana apəhànula uwaga aw takay? ²² Tsa baņa kiya uwanay kà, kanəfaw tetəvi, uwana kanəfəhəw uwarə aya aw. Tsòkw vok ala, kiya matsokw makatsekatsa la vok ala, kà uwana tetəvi uwaga kà awıs akul ala, kà uwana kawòyàhəw azlatatak mawisiga la mapapat gəl aņkul. ²³ Vəw tetəvi à Zəzagəla, kà mazəb madzugway aņkul, ŋgaha la ləv aņkul aña magay mawga. ²⁴ Nəfəw tetəvi mawga uwana Zəzagəla adəhəņ à ahəņ

kà aṅa magay kiya masla. Kiya matsokw lukut mawga à vok, kà uwana tetøvi uwatà kà dziriga, akəs à Zəzagəla à gəl.✧

²⁵ Kiya uwaga kà, kadahaw fida aya aw, pèhàw kà dziriga la azladza anik pəra, kà uwana anu gesina mədagay tekula.✧ ²⁶ Baṅa kapakàw ləv kà, dəhàw haṅkəli kà mapak ləv adala akul à madəhəṅ mawisiga à abà aw. Baṅa kadapakaw ləv, kadzaw à ahəṅ tsərəh à matəf à ahəṅ afats aw.✧ ²⁷ Kavàw tetøvi à seteni aw. ²⁸ Azlaməna gəl tasaka à gəl, tadaha sləray la ahəl aṅatà, kà atà aṅa mazlak azlauwana tanəkudə tatak babay. ²⁹ Pèhàw kà azlagay uwana tazigəṅ azladza anik, awkà kapəhaw azlagay deydayga aw; la tetøvi aṅa Zəzagəla la ama kà, pèhàw kà azlagay uwana azladza taslay kà aṅa matsəbal sləm lela. ³⁰ Kavàw ṅgərpa à Masasəfok Zəzagəla, uwana la ləv aṅkul la tsəh aw. Masasəfok uwaga kà, masəlay uwana Zəzagəla afà à akul à vok, kà masla mapəhla ala kà akul azlaaṅha. Apəhla ala babay kà bawbaw, kà adàbəl anu aṅa tetuwa. ³¹ Sàwla azlatatak dəhakakga à uda la ləv aṅkul la tsəh gesina la maf dza à ləv à abà la mapak ləv. Kabayaw vok gay aw, katsakaw vok magodəhay à gəl aw, ṅgaha bay, kagaw azlaməna makəsafər aw. ³² Gəw tələmma la slaka azladza anik, dəhàw delga à azladza anik babay aya, matsahawwaṅ à vok ala, kà à akul à akul, kà tatak uwana Kristu adəhəṅ kà aṅkul.

✧ **4:24** 4.24 1Musa 1.26 ✧ **4:25** 4.25 Zakari 8.16 ✧ **4:26** 4.26 Mahabay 4.4

5

Maday la uƒaka la abà

¹ Lagonay, kagaw azlabəza aña Zəzagəla, uwana awoya akul. Tsa kiya uwanay kà, gàw bokuba masla. ² La azlatatak gesina uwana la abà kadahaw à waŋ kà, wòyàw azlaməna magay aŋkul bokuba uwana Kristu awoya anu. Mamətsay uwana akəs kà, kà masla mapakay bokuba tatak matuwulla à anu à gəl, uwana akəs à Zəzagəla à gəl.✧

³ Lagwa kà, kagaw azladza aña Zəzagəla. Kadahaw mabila la azlatatak mawisiga anik anik babay aya aw. Kafaw yewdi à tatak aña azladza à tsəh aw. Baməraka bə mapəh gay lakəl aŋha kà, kapəhaw aw, ziruwi. ⁴ Delga kà aña mapəh azlagay ziruwiga aw, kusoŋu, ŋgaha la azlamatsakasl à gay deydayga kà delga aw. ‘Kikay’, gòdàw kà à Zəzagəla pəra kà tatak uwana adahəŋ. ⁵ Sèlàw kà, azlaməna mabila, ŋgaha la azlaməna madəh tsəhay tatak mawisiga uwaga, azlauwana tafa yewdi à tatak aña azladza à vok, la azlaməna masləkaw mazlazlay, la azlaməna huŋwa kà atà babay, tadəbəza makoray aña Zəzagəla la aña Kristu tetuwa aw, kà uwana azlatatak uwaga tahəd à atà à adi dafuwa gay Zəzagəla.

⁶ Azladza tavavara akul la azlagay deydayga aw, kà azlatatak mawisiga uwaga la uwana Zəzagəla apakà ləv, ŋgaha apaka ləv gesina lakəl aña azlauwana takweska gay aŋha. ⁷ Kità kà, katapaw ahəl à kəsład à abà akul nna aw.

✧ 5:2 5.2 2Musa 29.18; Mahabay 40.6

⁸ Uwarà kà akul la mөлөs la abà. Ama lagonay kà, akul la ufaka la abà, kà uwana akul azlaaᅇa Sufəl Yesu. Kiya uwaga kà, nəfàw maday aᅇa azlauwana atà la ufaka la abà. ⁹ Uwana gəgəđ uwaga kà, kà uwana ufaka kà avà azlatatak delga gesina, azlatatak dziriga, ᅇgaha azlatatak dzəba aᅇha səla aw gə. ¹⁰ Wəđàw vok à uda, kà akul aᅇa masəl azlatatak uwana akəs à Sufəl Zəzagəla à gəl. ¹¹ Kafaw ahəl aᅇkul à sləray aᅇa azladza uwana à abà, tadàh sləray mөлөs aw. Ama pəhàwatàla sləray mawisiga aᅇatà, uwana tadfehəᅇ la dazuwaya. ¹² Azlatatak uwana tadfehəᅇ la gəl la gəl kà kiya katsal à gay aw, ziruwi. ¹³ Baᅇa tapəhla azlatatak uwaga ala gesina la paraka kà, kanəᅇaw madz à ahəᅇ aᅇatà. ¹⁴ Kà uwana dèwdèw tatak uwana adapəhla vok ala, kà ufaka. Gay gə la uwaga à uwana tagəđ:

'Tsən ala à kak uwana kadzehəl,
 Sà à afik la mamətsay la abà,
 Kà Kristu aᅇa mav à ka ufaka!'

¹⁵ Kiya uwaga kà, akul kà đahàwwəᅇ kà delga pəra, kəla kaslà gesina, đahàw haᅇkəli la maday aᅇkul, kadaw bokuba maday aᅇa azladza uwana tasəl tatak aw aw, ama dàw kà bokuba azladza matsihilaga. ¹⁶ La məlo uwanay azladza tadàh azlatatak mawisiga aᅇuvaw kà, akul kà, đahàwəᅇ kà delga pəra kəla kaslà gesina. ¹⁷ Kagaw azlakusonᅇu aw, ama fàw sləm à ahəᅇ kà matsən tatak uwana asa à Sufəl gami kà madfehəᅇ.

¹⁸ Guzu akad à akul aw, kawisaw vok aᅇkul

ala aw. Gàw kà say mahənlaga la Masasəđok Zəzagəla pəra. ¹⁹ Həbàw azlamahabay aña Zəzagəla, ɲgaha azlamahabay anik, uwana Masasəđok avà à akul. Həbàw uwaga à Sufəl gami, zləbàw masla la ləv aɲkul gesina. ²⁰ Kikay, gòđàw à Zəzagəla Baba, kà azlatatak gesina la sləm aña Sufəl gami Yesu Kristu. Kikay, gòđàwwal la kaslà gesina.

Azlamis la azlazil

²¹ Akul uwana kadiɲaw gəl à Yesu Kristu à vok, kəsàw vok gay la ahəl ala kà akul à akul, bokuba uwana kadfahàwwàɲ à Kristu.

²² Akul azlamis, kəsàw gəl à ahəɲ la huma aña azlazil aɲkul, kiya uwana kakəsaw gay aña Sufəl Yesu. ²³ Kà uwana zil kà sufəl aña mis aɲha, bokuba Kristu uwana Sufəl aña maham à ahəɲ məna madiɲal gəl à vok. Kristu la uwana gəl gà, maham à ahəɲ məna madiɲal gəl à vok kà, kà vok aɲha, ɲgaha masla la uwana masla abəl atà. ²⁴ Tsa baɲa kiya uwanay kà, azlamis takəsa gəl à azlazil aɲatà à ahəɲ lela bokuba maham à ahəɲ məna gay Zəzagəla, uwana akəs à gəl à Yesu Kristu à ahəɲ.

²⁵ Akul azlazil, wòyàw azlamis aɲkul babay, bokuba Yesu Kristu uwana awoya azladza aɲha, ɲgaha aməts kà aɲatà. ²⁶ Aməts, kà maham à ahəɲ məna gay Zəzagəla aña magay aña Zəzagəla aña tetuwa. Apallàɲ ala la iyaw ɲgaha la gay aɲha. Kiya uwaga taga tsikaslağa kà Zəzagəla. ²⁷ Kà uwana asal kà atsa à wàɲ à huma aɲha, la mazləbay kokudfa alàh, tsidfaɲa lela, kokudfa mawisiga, sərđaka kokudfa madəbani à

tatak anik. ²⁸ Azlazil à bay kà kiya uwaga. Akul azlazil, wòyàw ankul bokuba uwana kawoyaw gəl ankul, dza uwana awoya mis anha kà, awoya gəl anha babay. ²⁹ Dza la ahəŋ, aslala vok apəsew vok anha aw, say avəl tatak may, afal sləm lela bokuba uwana Kristu afa sləm à azlaməna maham à ahəŋ məna gay Zəzagəla. ³⁰ Kà uwana anu gesina, mədagay bokuba vok anha, bokuba uwana tatsetsèr à wakitə Zəzagəla à abà: ³¹ 'Kà uwaga zil asak baba anha la iyà anha, kà atà anja maham gay à vok la mis anha, atà səla aya aw, tapakà vok tekula.'[☆] ³² Gay uwanay kà atapànula tatak dzəbā anha səla aw gə. Apəhay kà lakəl anja Kristu la maham à ahəŋ məna madiŋal gəl à vok anha. ³³ Kiya uwaga kà, ankul babay. Kəla uwabeyuwi ankul awoya mis anha, bokuba uwana awoya gəl anha. Azlamis kəsəw gay anja azlazil ankul.

6

Azlabəza la azlababa anətà

¹ Azlabəza, kəsəw gay anja azlababa ankul la azlaiyà ankul. Delga kà azlauwana tahamà gay à vok la Sufəl Yesu tadəhəŋ kiya uwanay. ² Tekula anja azlamapəhay agodf:

'Kəs gay anja baba la iyà anjak!'

Mapəhay uwaga kà mapəhay matera, uwana Zəzagəla azəŋ à uwana à adi, apəh à ahəŋ.

³ Uwaga agodf kà:

☆ **5:31** 5.31 1Musa 2.24

'Baņa kasləkaw atà kà, adagay delga kà anjak, kadàsafay mənğa la gudəŋ uwanay la vok.'☆

⁴ Akul azlababa anja azlabəza, kadàhawla ləv à azlabəza ankul à huf aw, dzadzaraw atà lela. Tapawatàla azlatatak, tsetsehawatàla, bokuba uwana Sufəl Yesu apəh à akul ala tetəvi.

Azlamayà la azlamənğa anjatà

⁵ Azlamayà kəsaw gay anja azlamənğa ankul la gudəŋ uwanay la vok. Tsənaw atà. Nğaha hòyaw yewdi anja atà, sèklaw la huma anjatà, dəhàw sləray la ləv tekula. Anja kiya uwaga kà, kakəsaw Kristu. ⁶ Kadahaw sləray kà huma yewdi anjatà pəra bokuba anja azlauwana asa atà kà azladza anja mazləb atà aw. Sèlaw kà, akul azlaməna sləray anja Kristu, nğaha dəhàw azlatatak uwana asa à Zəzagəla gesina la ləv tekula. ⁷ Dahàw sləray la ləv tekula bokuba uwana naka kadahaw sləray anja Kristu, awkà bokuba uwana kadahaw sləray anja azladza aw. ⁸ Sèlaw kà, kəla azlatatak delga, uwana dza adəhəŋ kà, Sufəl Yesu Kristu adəpəlal. Adəgay mayà, adəgay masla makor gəl. ⁹ Akul azlamənğa anja azlamayà, dəhàw delga à azlamayà ankul babay, kafaw atà gasa à gəl aw, kà uwana kasəlaw kà, gesina ankul kà, akul anja madzahaga tekula uwana la zagəla la afik. Masla kà avah dza mavəhay aw.☆

Kazlanja anja guvəl

☆ **6:3** 6.3 2Musa 20.12; 5Musa 5.16 ☆ **6:9** 6.9 5Musa 10.17

¹⁰ Gay gulo uwana asa à gi makəðfalla gəl kà, gəw la ndzəða la ahəl aña Sufəl gami, la ndzəða mənğa aña la abà. ¹¹ Hələw kazlaña aña guvəl uwana Zəzagəla abək à akul gesina, kəsəwwəñ la ahəl, kà akul aña mapalla guvəl la seteni, kà aña seteni apapat akul, kà akul aña mahəl la ahəñ la masla. ¹² Guvəl uwana məpay kà, məpay kà la azladza aw, məpay kà la azlamasasəðok mawisiga, ñgaha la azlasufəl añaatà, uwana takor gudəñ à vok mawisiga uwanay, məpa guvəl la azlatatak mawisiga gesina, uwana atà la ndzəða la afað la abà la zagəla. ¹³ Hələw kazlaña aña guvəl, uwana Zəzagəla abək à akul gesina, baña guvəl uwana akəl akəl gə, kà akul aña mahəl la ahəñ. Atà aña magəð ndzəða à afik, ñgaha kà aña kul aña masakala slaka aw. ¹⁴ Kità kà, dəhəw vok à ahəñ, gəw azladza dziriga, azlatatak dziriga kà kalkal la parapara, uwana kawadla vok ala nəts, kà akul aña madəh vok à ahəñ lela. Dəw la tetəvi dziriga aña Zəzagəla la ama, kà uwana baña kadəhawwan kiya uwaga kà, adapakay kà bokuba slarapay makəla, uwana kawadəhawla vok ala, kà madz akul à ama. ¹⁵ Zəw gay marabəñ, uwana av lapiya à azladza kokudə may vok, uwaga kà kalkal bokuba uwana kabəkaw kwimik à asik kà maday la lela la tetəvi aña Zəzagəla la tsəh. ¹⁶ Vəw ləv aña kul à Sufəl Yesu la kaslə gesina, bokuba uwana guloku aga akul la ahəl, kà godam uwana seteni amal à wəñ, aña mabəz akul aw. Bamərika magur adagay la godam uwaga lakəl bay, kà guloku adzalla à ama. ¹⁷ Tatak uwana Zəzagəla atəfla à akul kà kalkal huməz

gəl anja guvəl, uwana tafa à gəl kà madz à gəl à ama, ngaha zèbàw katsakar anja Masasəđok, uwana Zəzagəla avà à akul babay, uwaga kà gay Zəzagəla.✧ ¹⁸ Dèvəw kudə à Zəzagəla la ləv tekula la kaslà gesina, kèləw gay la ndzəđə anja Masasəđok. Dzàw à ahəŋ la adi, karuwaw vok ahəŋ aw, dèvəw kudə koksikoksi, kà azladza anja Zəzagəla gesina. ¹⁹ Dèvəw kudə à Zəzagəla kà anulo babay, kà Zəzagəla anja mav à gi gay dziriga uwana gədəpəhay, ngaha kà gi anja maz gay marabəŋ kokudə guba, kà gi anja mafətəl à adi ala la paraka. ²⁰ Kà gay marabəŋ uwaga Yesu Kristu afə gi à ahəŋ, kà masla masləl gi anja, kà gi anja mad maziŋ à azladza anik, baməraka gədagay la daŋay bay kà, kà guba anja makəs gi aw, kà gi anja mapəhay la dazuwaya, bokuba uwana asa à Zəzagəla gəpəhay.

Ayyi makəđ gəl à ahəŋ

²¹ Tisik, deda gami uwana məwoyaŋ, adəh sləray anja Sufəl gami la ahəl səla, adəpəh à akul madz à ahəŋ gulo, kà akul anja masəl uwana gədeheŋ gesina. ²² Uwana gəsləl masla à slaka ankul kà, kà akul anja masəl madz à ahəŋ gami, ngaha kà masla anja madzərəđəh akul à uda babay.

²³ Zəzagəla Baba, la Sufəl gami Yesu Kristu tavə à akul lapiya, à akul azladeda gesina kà, kasələw mawoy vok kà akul à akul, ngaha kadiŋaw gəl à Yesu Kristu à vok. ²⁴ Vok mahamay anja Zəzagəla agay la azladza uwana tawoya

✧ **6:17** 6.17 Yesayya 11.5; 52.7; 59.17

Sufəl gami Yesu Kristu, la masal uwana adəv à
gay aW.

**Wakità Zəzagəla Wakitə Anja Makəs Vok
Slawda Mawga (Cameroun)
Matal: Wakitə Zəzagəla Wakitə Anja Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

03efbf2f-98ca-5534-8610-0be3a8c4b974